

«Las pendicularas èn il motor dal turissem»

Pendicularas Grischun: Radunanza generala

DA GION NUTEGN STGIER / ANR

■ **La strategia dals pretschs, la cooperaziun entaifer la bransch, la tscherna da l'emprima dunna en la suprastanza e la festa da giubileum. Quai èn las lingias grassas da la radunanza generala da l'uniun a Tavau. La culissa n'avess betg savì esser pli magnifica per la radunanza da giubileum da 50 onns Pendicularas Grischun.** In di da bellezza al Jakobshorn, ina cuntrada da naiv e pistas idealas. In maletg sco fatg per la buna ambienta tranter ils blers represchentants da la bransch, da la politica, da l'economia e dal turissem.

Buna prevendita

El saja da buna speranza per la stagiun d'enviern 2017/18 che haja cumenzà cun cifras plaschaivals, ha ditg *Martin Hug*, il president da Pendicularas Grischun, en ses pled d'introducziun. Suenter trais stagiuns d'enviern pli «magras» e dus envierns cun ina svieuta da traffic sut 200 milliuns francs quinta el cun in meglierament cun esser las premissas bunas e cun esser en las regions pli autas bunas relaziuns da naiv. Ultra da quai saja la prevendita da las cartas da stagiun stada buna fin ussa, ha menziunà Hug.

Il giast è pront da pajar

Hug è tut auter che intgantà da la strategia da pretschs da tschertas pendicularas, cunzunt en il Vallais ed er en la Part sura Bernaisa. D'ir sin il martgà cun pretschs reducids rinforzia cunzunt il cumbat, uschenavant ch'ina ubain l'autra pendiculara stoppia ceder. Hug è persuas che quella politica da pretschs donnagescha la bransch e na promova insumma betg ina buna collavuraziun tranter las pendi-



Manuela Seeli, la nova suprastanta da Pendicularas Grischun, cun ses antecessur Andrea Camastral.

FOTO G. N. STGIER

cularas. Hug ha avertì als preschents da mantegnair ils pretschs, cunzunt per il bain dal manaschi e lura er en vista a las investiziuns necessarias che mintga pendiculara haja. Il giast saja pront da pajar per qualitad, in bun servis ed per ina infrastruttura moderna. Las pendicularas en l'Austria hajan ils davos onns augmen-

tà ils pretschs per passa 3% empè da sbassar quels. Cun sbassar ils pretschs sa taglia mintga manaschi sez, ha menziunà Hug.

Meglras cundiziuns da basa

Anc na saja la bransch dependenta da sustegn finanziel dal maun public e quel

sustegn n'haja er betg prioritad, ha accentuà Hug. Dentant fissi da beneventar meglras cundiziuns da basa e quai da la confederaziun sco er dal chantun, ha menziunà il president da Pendicularas Grischun. Damain regulaziuns e cunzunt er pli paucas taxas savessan las pendicularas be beneventar. Hug spera er da

realisar in center da competenza per la bransch, cunzunt per simplifitgar tut las lavurs administrativas sin champ chantunal e naziunal. El ha er supplitgà ils preschents da cooperar pli fitg, pertge cun ina buna cooperaziun saja segir pussaivel da spargnar tar ils custs.

Da gronda impurtanza naziunala

In dals gratulants per l'uniun giubilara è er stà cusseglier guvernativ *Jon Domenic Parolini*. El ha ditg che las pendicularas hajan contribuì immens bier al svilup turistic da noss chantun. Il schef dal departament d'economia publica ha er ditg che las pendicularas sajan e restian il motor dal turissem grischun. *Fritz Jost*, il vicepresidente da Pendicularas Svizra, ha ditg en ses pled da gratualziun che las pendicularas grischunas sajan da fitg gronda impurtanza per la bransch. La diversitad da quellas saja exemplarica, uschia che l'entira bransch svizra profiteschia.

Manuela Seeli per Andrea Camastral

En tractanda èn er stadas elecziuns parzialas da la suprastanza. Confermads en lur uffizis èn vegnids *Philipp Hollenstein*, il directur d'Arosa Pendicularas SA, e *Markus Moser*, il «CEO» da Corvatsch Pendicularas SA. Demissiunà aveva *Andrea Camastral*, l'antieriur directur da Spleia Pendicularas SA, el che represchentava en la suprastanza la regiun da mez dal Grischun. El vegn remplazzà entras *Manuela Seeli*, la directura da las Pendicularas Cuir SA. Ella è l'emprima dunna che fa part da la suprastanza da Pendicularas Grischun. Seeli è già dapi intgins onns activa en la bransch cun avair fatg part da la direcziun da Lai Pendicularas SA ed er esser stada directura administrativa da Savognin Pendicularas SA.